

**Bil. 29**

**Khamis**

**18 Julai 2019**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGAL KEDUA  
MESYUARAT KEDUA**

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Cadangan untuk Menaik Taraf Jalan Ramayah  
ke Jalan Putatan Termasuk 'Flyover' di Putatan**  
- *YB. Tuan Awang Husaini bin Sahari (Putatan)* [Halaman 1]
- **Isu Belia FELDA**  
- *YB. Dato' Sri Dr. Santhara (Segamat)* [Halaman 3]

**MALAYSIA  
KAMAR KHAS  
PARLIMEN KEEMPAT BELAS  
PENGKAL KEDUA  
MESYUARAT KEDUA  
Khamis, 18 Julai 2019**

**Mesyuarat dimulakan pada pukul 2.30 petang**

**DOA**

*[Tuan Yang di-Pertua **mempengerusikan Mesyuarat**]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Cadangan untuk Menaik Taraf Jalan Ramayah  
ke Jalan Putatan Termasuk 'Flyover' di Putatan**

**2.34 ptg.**

**Tuan Awang Husaini bin Sahari [Putatan]:** Terima kasih Tuan Yang di-Pertua. Cadangan untuk Menaik Taraf Jalan Ramayah ke Jalan Putatan Termasuk 'Flyover' di Putatan. Berhubung dengan perkara di atas, sukacitanya dinyatakan bahawa jalan tersebut adalah merupakan laluan utama yang menghubungkan Bandaraya Kota Kinabalu dan kawasan lain melalui kawasan Putatan, Penampang dan sehingga ke kawasan pendalaman bawah negeri Sabah. Keperluan mendesak untuk menaik taraf jalan serta 'flyover' dari Putatan ini adalah kerana:

- (i) kesesakan lalu lintas di kawasan ini sejak beberapa tahun yang lalu;
- (ii) Parlimen Putatan telah mencatatkan pertumbuhan penduduk yang tinggi ekoran daripada projek-projek perumahan yang rancak membangun di Putatan dan juga kawasan sekitarnya; dan
- (iii) untuk persediaan pertambahan kenderaan apabila projek Pan Borneo siap kelak

Untuk pengetahuan, Jabatan Kerja Raya Negeri Sabah telah pun menghantar cadangan seperti yang dikemukakan di atas ke Kementerian Kerja Raya Malaysia di bawah 'Program Traffic Mitigation'. Oleh yang demikian, saya ingin tahu apakah status terkini projek seperti maksud di atas agar projek ini dapat dimasukkan di dalam Rancangan Malaysia

Ke-12 yang akan bermula tahun hadapan. Sekian, terima kasih.

**2.35 ptg.**

**Timbalan Menteri Kerja Raya [Tuan Haji Mohd. Anuar Mohd. Tahir]:** Tuan Yang Di-Pertua, *Assalamualaikum warahmatullahi wabarakatuh* dan selamat petang. Saya mengucapkan setinggi-tinggi terima kasih kepada Yang Berhormat Tuan Awang Husaini bin Sahari, Ahli Parlimen Putatan yg telah berucap atas tajuk Cadangan Untuk Menaik Taraf Jalan Ramayah ke Jalan Putatan Termasuk 'Flyover' di Putatan. Tuan Yang di-Pertua, sukacita saya menarik perhatian Ahli Yang Berhormat berdasarkan semakan yang dibuat oleh kementerian ini dengan Jabatan Kerja Raya Negeri Sabah, adapun Jalan Ramayah ke Putatan adalah merupakan jalan negeri, bukannya Jalan Persekutuan.

Oleh yang demikian, peruntukan bagi pelaksanaan menaik taraf jalan tersebut adalah di bawah bidang kuasa Kerajaan Negeri Sabah. Sehubungan dengan itu, cadangan permohonan untuk menaik taraf Jalan Ramayah ke Jalan Putatan termasuk *flyover* di Putatan tidak disenaraikan oleh JKR negeri Sabah di dalam permohonan projek baharu di bawah *Rolling Plan 4* (RP4 2020), RMKe-11 yang lalu kerana ianya adalah merupakan jalan negeri.

Tuan Yang di-Pertua, walau bagaimanapun, kementerian ini mengambil maklum berkenaan masalah kesesakan lalu lintas sedia ada di kawasan Putatan. Bagi tindakan jangka pendek, kementerian ini mencadangkan kepada JKR Negeri Sabah agar mengenal pasti dan melaksanakan tindakan rawatan setempat (*localized remedial measures*), dengan izin, Tuan Yang di-Pertua. Manakala bagi tindakan jangka panjang, kerajaan negeri boleh mengambil tindakan untuk menaik taraf infrastruktur jalan-jalan ini mengikut keperluan serta kemampuan kerajaan negeri memandangkan ianya di bawah bidang kuasa pihaknya.

Jadi Yang Berhormat Putatan, kita kena 'lobi' sedikit kepada kerajaan negeri dalam isu ini. Kami ingin membantu setakat yang kami mampu tetapi di dalam konteks membina jalan baru, membina 'flyover' di Putatan itu memang di luar bidang kuasa kami. Walau bagaimanapun, seperti mana yang saya sebut tadi, kami akan meminta dan telah mengarahkan pihak JKR negeri untuk membantu dalam hal kesesakan lalu lintas tadi dalam pembaikan-pembaikan bukan yang terlalu besar, *insya-Allah*, akan dilakukan oleh pihak JKR. Terima kasih Tuan Yang di-Pertua.

■1440

**Isu Belia FELDA****2.40 ptg.**

**Dato' Sri Dr. Santhara [Segamat]:** Terima kasih Tuan Yang di-Pertua. Pertama sekali, saya ingin mengucapkan setinggi-tinggi penghargaan kepada pihak Kementerian Belia dan Sukan Malaysia atas segala usaha untuk memajukan sukan dan belia nasional demi kepentingan seluruh rakyat Malaysia dan juga menyumbang kepada pembangunan Malaysia.

Pihak kementerian diminta untuk menjelaskan mengenai pembangunan kompleks belia dan sukan di kawasan-kawasan pedalaman dan FELDA untuk kegunaan belia-belia di kawasan tersebut. Saya dapati kementerian kurang memberi fokus kepada belia-belia di kawasan pedalaman dan FELDA.

Sehubungan dengan itu, saya minta pihak kementerian mengulas dengan terperinci mengenai perkembangan pembangunan infrastruktur untuk golongan belia di kawasan pedalaman dan FELDA, termasuk jumlah peruntukan yang telah diluluskan dan digunakan setakat ini, status infrastruktur sama ada telah diselenggarakan dan dijaga dengan baik.

Tambahan itu, pihak kementerian juga diminta menerangkan mengenai rancangan kerajaan untuk membantu memperkasakan golongan belia di kawasan pedalaman dan FELDA kerana gejala-gejala sosial seperti penyalahgunaan dadah dan 'mat rempit' semakin meruncing, contohnya di FELDA Palong Timur, Daerah Segamat. Kementerian diminta menyatakan pelan rancangan untuk membanteras gejala sosial di kalangan belia yang kronik sebab ketiadaan *facilities* sukan seperti futsal, pusat sukan dan lain-lain lagi. Adakah pihak kementerian sedia untuk melabur dalam menyediakan kompleks sukan serta *facilities* sukan untuk belia-belia di FELDA Palong Timur, Daerah Segamat.

**2.42 ptg.**

**Timbalan Menteri Belia dan Sukan [Tuan Sim Chee Keong]:** Terima kasih Tuan Yang di-Pertua dan juga terima kasih kepada Ahli Yang Berhormat daripada kawasan Segamat atas isu-isu yang dibangkitkan tadi. Untuk makluman Ahli Yang Berhormat, Kementerian Belia dan Sukan sentiasa menitikberatkan kemudahan sukan bagi kegunaan dan keselesaan masyarakat tanpa mengira lokasi sama ada di kawasan bandar mahupun di luar bandar termasuk di kawasan Rancangan FELDA di seluruh negara. Mungkin pada masa yang lalu atau lampau, kerajaan yang terdahulu kurang memberikan perhatian yang serius tetapi pentadbiran pada hari ini sudah tentu

akan mengambil iktibar daripada kekurangan pada masa lalu untuk menambah baik perkhidmatan Kementerian Belia dan Sukan terutamanya dalam sektor luar bandar ini.

Justeru, satu perbincangan bersama pihak FELDA telah diadakan pada 15 April 2019, tahun ini, di mana Kementerian Belia dan Sukan bersama-sama dengan pihak FELDA telah membincangkan berkaitan status dan keadaan semasa kemudahan dan infrastruktur sukan di seluruh kawasan Rancangan FELDA di seluruh negara. Berdasarkan kepada maklumat yang dikongsi, terdapat kemudahan sukan sedia ada yang terdiri daripada 25 buah Kompleks Sukan Komuniti, 276 buah padang awam dan 292 gelanggang futsal di dalam kawasan Rancangan FELDA di seluruh negara yang telah disediakan.

Bagi Wilayah FELDA Segamat, Johor, bilangan kemudahan sukan sedia ada terdiri daripada dua buah Kompleks Sukan Komuniti, 25 padang awam dan 27 gelanggang futsal. Berdasarkan kepada perbincangan tersebut, kedua-dua pihak bersetuju bahawa setakat ini tiada pembinaan baharu bagi kemudahan sukan di kawasan rancangan FELDA. Namun tumpuan akan diberikan ke arah menaik taraf dan membaik pulih kemudahan dan infrastruktur sukan sedia ada bagi memaksimumkan penggunaan kemudahan yang telah pun dibina dahulu.

Sehubungan dengan itu, Kementerian Belia dan Sukan telah membuat permohonan kepada Kementerian Hal Ehwal Ekonomi (MEA) bagi projek-projek menaik taraf kemudahan sukan di kawasan FELDA di dalam pembentangan Cadangan Projek Pembangunan Kementerian Belia dan Sukan, *Rolling Plan* keempat (RP-4) Rancangan Malaysia Ke-11 (RMKe-11) tahun 2020 nanti. Kerja-kerja menaik taraf kemudahan sukan di kawasan Rancangan FELDA akan dilaksanakan secara berperingkat setelah mendapat kelulusan daripada kementerian tersebut.

Untuk makluman Ahi Yang Berhormat juga, Kementerian Belia dan Sukan memandang serius dan menyokong inisiatif dalam membanteras masalah penyalahgunaan dadah dalam kalangan anak muda dan belia. Antara inisiatif kementerian ialah Program Jati Diri Belia Berisiko yang memberi pendedahan, pemahaman dan kesedaran kepada golongan belia berisiko tentang bahaya masalah sosial, dadah dan membangunkan potensi generasi muda menerusi penerapan aktiviti kerohanian dan kemahiran jati diri.

Bagi tahun 2019, KBS menyasar untuk melaksanakan enam program di peringkat negeri merangkumi kawasan gelandangan dan kawasan FELDA yang terpilih dengan anggaran penyertaan seramai 480 orang peserta. Salah satu kawasan yang terpilih untuk program ini ialah FELDA Palong Timur, Daerah Segamat, negeri Johor Darul Takzim yang akan dilaksanakan antara bulan Ogos hingga bulan November 2019 nanti. Saya akan memohon kakitangan pejabat saya untuk memberi makluman kepada Yang Berhormat Ahli Segamat supaya boleh juga turut mengambil berat tentang program yang bakal diadakan tersebut.

Program ini akan dilaksanakan dengan kerjasama Majlis Belia Malaysia (MBM), Jabatan Kemajuan Islam Malaysia (JAKIM), Agensi Anti Dadah Kebangsaan (AADK), Polis Diraja Malaysia (PDRM), Lembaga Kemajuan Tanah Persekutuan (FELDA) dan Majlis Belia FELDA Malaysia (MBFM).

Metodologi program ini merangkumi santapan kerohanian, bengkel, dialog, pembentangan kumpulan, lawatan dan demonstrasi serta aktiviti riadah. Pengisian program akan melibatkan topik-topik seperti dadah dan penyalahgunaannya serta peranan belia terhadap keselamatan dan pembangunan diri, keluarga, masyarakat dan negara. Selepas pelaksanaan program, pihak kementerian, AADK, JAKIM, MBM dan MBFM akan membuat pemantauan susulan terhadap peserta program untuk perancangan selanjutnya. Terima kasih.

**Tuan Yang di-Pertua:** Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga satu tarikh yang tidak ditetapkan.

***[Kamar Khas ditangguhkan pada pukul 2.47 petang]***